



	Subuh	Syuruk	Zuhur	Asar	Maghrib	Isyak		Subuh	Syuruk	Zuhur	Asar	Maghrib	Isyak		Subuh	Syuruk	Zuhur	Asar	Maghrib	Isyak
Kuala Lumpur	5:52	7:02	1:05	4:27	7:02	8:16	Johor Bahru	5:40	6:53	12:56	4:19	6:56	8:09	Kuala Terengganu	5:48	7:01	12:58	4:20	6:52	8:06
Shah Alam	5:52	7:02	1:05	4:27	7:02	8:16	Ipoh	5:56	7:06	1:07	4:29	7:02	8:16	Kota Bharu	5:53	7:06	1:02	4:23	6:55	8:05
Seremban	5:48	7:01	1:03	4:26	7:01	8:15	Pulau Pinang	5:59	7:10	1:09	4:31	7:03	8:17	Kuantan	5:45	6:58	12:59	4:21	6:56	8:10
Melaka	5:47	7:00	1:02	4:25	7:01	8:15	Alor Setar	6:01	7:11	1:09	4:30	7:02	8:16	Kangar	6:00	7:14	1:09	4:30	7:02	8:16

Penyeludupan unggas dari negara jiranancam penyebaran selesema burung

# Ayam hidup Siam boleh bawa penyakit

Oleh NOR AZIAH MAT NOH

**PETALING JAYA** – Selain menyalahi undang-undang, aktiviti penyeludupan ayam hidup dari Thailand yang semakin berleluasa ketika ini dibimbangi akan menjadi punca kepada penyebaran penyakit selesema burung di negara ini.

Lebih menakutkan apabila virus selesema burung itu turut berpotensi untuk menjangkiti manusia seperti mana yang pernah berlaku di negara-negara seperti Kemboja, China, Indonesia dan Thailand pada tahun 2004 sehingga 2006.

Sebagai contoh, penyakit selesema burung yang pernah melanda Thailand menerusi virus Avian Influenza A (H5N1) pada 2003 telah merebak ke negeri Kelantan pada 2004 menyebabkan ternakan ayam dan itik terkesan teruk.

Pegawai Veterinar dari Pusat Pertanian Putra, Universiti Putra Malaysia (UPM), Dr. Muhammad Azrolharith Rashid berkata, aktiviti penyeludupan ayam hidup ke negara ini adalah tidak dibenarkan kerana dikhuatiri menjadi punca kepada merebaknya penyakit selesema burung.

Katanya, meskipun peniaga tempatan yang memasarkan ayam berkenaan menjamin dari aspek halal dan kebersihan haiwan berkenaan, ia masih memberi risiko terutama kepada pengguna.

“Haiwan ternakan seperti ayam berada di bawah tanggungjawab Jabatan Perkhidmatan Kuarantin dan Pemeriksaan Malaysia (Maqis) dan diwajibkan untuk dikuarantin dalam satu tempoh masa yang spesifik bagi memastikan haiwan tersebut tidak membawa sebarang pe-

## Selesema burung

- Disebabkan virus Avian Influenza A (H5N1)
- Mudah berjangkit antara burung dan boleh membunuh ayam dan itik
- Burung yang dijangkiti mengeluarkan virus melalui air liur, lehanan air hidung dan najis
- Beberapa kes jangkitan ke atas manusia berlaku di Kemboja, Indonesia, Vietnam, Hong Kong dan China
- Manusia boleh dijangkiti melalui kontak dengan burung liar dan binatang ternakan yang dijangkiti
- Antara tanda-tanda selesema burung kepada manusia ialah demam, batuk, sakit tekak, sakit-sakit sendi, kesukaran bernafas, jangkitan paru-paru dan sakit mata

nyakit,” katanya ketika dihubungi *Kosmo!* di sini semalam.

Beliau berkata demikian sebagai mengulas mengenai laporan muka depan *Kosmo!* Ahad semalam yang mendedahkan mengenai aktiviti penyeludupan ayam hidup dari Thailand.

Tambah beliau, dalam tempoh kuarantin itu, perubahan iklim boleh menyebabkan penyakit bawaan unggas atau haiwan ternakan lain muncul termasuklah kes penyakit *Lumpy Skin Disease* (LSD) yang dikesan ke atas ternakan lembu sebelum ini.

“Jika ayam hidup masuk ke negara kita tanpa pemeriksaan daripada pihak Maqis, ia berisiko membawa penyakit kepada haiwan-haiwan lain, sekali gus boleh menyebabkan kewujudan virus atau penyakit baharu.

“Walaupun haiwan ternakan itu tidak mempunyai virus se-



**PENYEBARAN penyakit selesema burung tidak hanya mengancam haiwan ternakan, tetapi turut memberi kesan kepada manusia.** – GAMBAR HIASAN

lesema burung, haiwan itu masih perlu menjalani kuarantin bagi memastikan ia bebas daripada penyakit-penyakit yang lain,” katanya.

Jelasnya, bagi haiwan yang telah disembelih, pemeriksaan juga perlu dilakukan selepas proses penyembelihan bagi mengesan sama ada haiwan itu masih membawa penyakit ataupun tidak.

Selain itu katanya, penternak yang terlibat menguruskan haiwan seludup juga terdedah ke-

pada sebarang bentuk jangkitan penyakit sama ada ketika proses menternak mahupun penyembelihan.

“Apabila haiwan itu diseludup, kita tidak dapat pastikan aspek kebersihan dan kesihatannya sebelum dibawa masuk ke negara ini.

“Bagi mereka yang memakan ayam seludup terbabit, dikhuatiri mereka juga terdedah kepada jangkitan penyakit.

“Seelok-eloknya, peniaga membeli ayam hidup dari pasa-

ran tempatan bagi menjaga standard kebersihan dan memastikan industri makanan kita kekal selamat,” tambahnya.

Terdahulu, *Kosmo!* Ahad semalam melaporkan mengenai isu lambakan ayam hidup Siam disyaki diseludup ke Kota Bharu, Tumpat dan Pasir Mas untuk dijual kepada pengguna.

Tindakan itu dibuat atas alasan para peniaga tidak mampu lagi menampung kos operasi yang tinggi di pasaran tempatan.

## Kelantan ambil serius isu seludup ayam dari Thailand



**KERATAN Kosmo! Ahad semalam.**

Oleh YATIMIN ABDULLAH

**KOTA BHARU** – Kerajaan negeri Kelantan sedang menunggu maklumat penuh berkaitan isu lambakan ayam dari negara jiran yang diseludup masuk ke negara ini sebelum disembelih bagi tujuan dijual di pasaran tempatan.

Pengerusi Jawatankuasa Pertanian, Industri Asas Tani, Bioteknologi, Teknologi Hijau dan Alam Sekitar negeri, Mohd. Saripudin Tuan Ismail berkata, pihaknya sudah meminta agensi berkaitan menyediakan maklumat berkaitan berhubung perkara tersebut.

“Buat masa ini, saya tidak

boleh memberikan sebarang ulasan. Apabila dapat maklumat, kita akan kongsi,” katanya ringkas ketika dihubungi *Kosmo!* semalam.

Menerusi pendedahan *Kosmo!* Ahad semalam, kenaikan harga ayam di pasaran tempatan menjadi alasan segelintir peniaga di negeri ini bersekongkol dengan

penyeludup untuk mendapatkan bekalan dari Siam yang didakwa lebih murah hingga mengakibatkan berlaku lambakan di beberapa buah daerah.

Sebanyak 1,000 hingga 2,000 ekor ayam hidup diseludup bagi menampung permintaan peniaga di Kota Bharu, Pasir Mas dan Tumpat setiap hari.